



Nuuk, 09. februar 2015

Inatsisartut suleriaasianni § 37 imm. 1 naapertorlugu Naalackersuisunut ima apeqquteqarpunga:

Naalackersuisunut apeqqutit:

1) Naalackersuisut isumaqatigaat, siunissami assingisaanik pisoqarnissaa pinngitsoorumallugu, Pituffimmi sakkutooqarfimmi aserfallatsaalinermut sullissinissamik isumaqatigiissutip tunniunneqarnerani suliap ingerlanerata qulaajarneqarnissaa pingaartuusoq?

2) Sullissinissamik isumaqatigiissutip ingerlatseqatigiiffimmut Danmarkimi nalunaarsoqqagaluarluni Amerikamiunit pigineqartumut tunniunneqarnerani suliap ingerlanerata tamarmiusup, Naalackersuisut arlaannaannulluunniit attuumangitsumik misissorneqarnissaa sulissutigiumavaat, tassuunakkut Kalaallit Nunaata inissisimanerata pitsaasortai pitsaanngitsortaalu tamakkiisumik qulaajarneqaaqqullugit?

3) Taamaangippat Naalackersuisut qanoq iliorniarpat, suutigut qangalu ajutoortoqarsimanera qulaajarumallugu, taama pisoqaqqinnginnissaa tamatumani qularnaarumallugu?

(Sara Olsvig, Inatsisartunut ilaasortaq, Inuit Ataqtigiit)

Tunggavilersuut:

Qularutissaangilaq Kalaallit Nunaanni Danmarkimilu partiit tamarmik Pituffimmi sakkutooqarfimmi sullissinissamik isumaqatigiissutip ingerlatseqatigiiffimmut Danmarkimi nalunaarsoqqagaluarluni Amerikamiunut pigineqartumut tunniunneqarnerani ajutoorneq tamaat pinngitsoorumanerugaluaraat. Tamatta soqutigisarivarput qulaajassallugu suut ajutoorsimanersut qangalu taama pisoqarsimanersaq. Tamatumani qularnaarumallugu kukkunerujunnartut uteqqinneqannginnissaat, aamma qularnaarumallugu aqqissuussinerup arlaani aamma Nunatta Amerikamiut danskillu akornanni isumaqatigiissutini amigaataajunnartut aqqiivigineqarnissaat, tamatumani siunissami Kalaallit Nunaat nukittunerulluni inissisimaqqullugu.

Taamaammat Inuit Ataqtigiinniit Naalackersuisut Nunanut Allanut Sillimaniarnermullu Ataatsimiitaliami isumasioqatigineranni piumasarivarput, suliap arlaannaannulluunniit attuumangitsumik Naalackersuisut/Kalaallit Nunaata suliapi inissisimasimanerisa misissuiffiginerisigut qulaajaaffigineqassasoq. Maannamut Inatsisartuni partiinit allaniit imaluunniit Naalackersuisuniit suli qisuariartoqanngilaq; taamaammat § 37 tunggavigalugu maanna apeqquteqarpugut.

Inuit Ataqtigiit pingaartippaat erseqqissassallugu, isumaqaratta suliapi uani Kalaallit Nunaata ataatsimoornissaa pingaartorujussuusoq. Taamaammat arlaannaannulluunniit attuumangitsumik misissuisoqarnissaanik piumasaqaat tassaatinneqassanngilaq maanna Naalackersuisunik siuliinilluunniit uparuaaneq, kisiannili tassaasoq

aaqqissuussinermi aamma Danmark-mut USA-mullu isumaqatigiissutini
sanngiffiorpasissut Kalaallit Nunaanniit aaqqinneqarnissaat qularnaarumallugu
piumasaqaatigisarput.

Naalackersuisuniit ilalerisumik akineqarnissarput neriuutigaarput, Kalaallit Nunaat suliami
matumani pilersitsiffiusumnik ingerlariaqqissinnaaqullugu.

Siumoortumik qinnutigissavara apeqquteqaatit tamarmik ullut suliffiit qulit
ingerlaneranni akineqassasut.